



TEZAU LITURGIC

20 NOIEMBRIE

**SLUJBA
SF.PREOT-MUCENIC
VLADIMIR
MEDVEDIUK
DE LA
MOSCOVA**



MOSCOVA, 2000



Служба сщмч. Владимиру Медведюку

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи воззвах:

стихиры предпразднства 3и святому 5, глас 2

Подобен: Егда от Древа:

Егда Владимире яснейше / путь ко Господу
управил еси, / тогда возрадившее тя отечество
оставль, / промыслу Всеблагаго Бога повинуюся,
/ славнаго града Москвы достиг, / идеже и
приял еси священный сан, / да послужиши
Христу Возлюбленному, / Иже есть Свет и Путь
// и Жизнь истинная.

Егда попущением Божиим / восхитиша власть
на Руси зверонравнии, / тогда, о Владимире
доблественне, / дерзновенно восприял еси
пресвитерство, / еже в сиевые окаянныя дни /
мученичеству равнодостойно есть, / аще
пастырь следует Христу до конца, /
присносущну Свету и Пути // и Жизни
истинней.

Егда Митрофана священный удел / обрел есть в
тебе, о Владимире, / новаго светоча
добродетели, / слава того просия окрест / тебе
ради воистину солнца, / уясняюща людям стези

духовныя, / еще же согревающа страждущия: /
сиде бо учит Свет миру Христос, // Слово Отчее
и Жизнь истинная.

Егда, о Владимире мужественне, / испытание
новое от Господа достиже тя, / яко и храму
заключену быти / и тебе несправедно осуждену
на работы горькия, / тогда среде злостраданий
лютых / просия долготерпением вера твоя: /
такое бо прославить имя Отчее / благоволи в тебе
Христос, // Свет и Путь и Жизнь истинная.

Егда тебе, Владимире смиреннейше, / искушену
скорбьми по всяческим, / вселиться в тишине
Язвизца-села, / и тогда ясный свет твоея души /
не возмоще утаиться отнюд, / мужавшимся
верным в сиянии твоём / и безсильно ярящимся
служителем тьмы, / не могущим коснуться в
тебе глубины духа, // еже во Христе жизни
истинней.

Слава, глас и подобен тойже:

Любы слава есть пастыря, / слава мученик —
страдание; / слава твоя, Владимире, сугуба есть
— / пастыря добра, душу за овцы положивша, /
пострадавша же до крове за Христа. / Сего ради
венчает тя Царь славы Господь, / сорадуется же
полк новомученик, / и мы земнии прославляем
тя, // молитвенника о душах наших.

И ныне, предпразднства.

Вход. Прокимен дне и чтения 3.

Пророчества Исаиина чтение:

Обратися от небесе, Господи, и виждь от дому святого Твоего и славы Твоея: / где есть ревность Твоя и крепость Твоя? / Где есть множество милости Твоея и щедрот Твоих, яко терпел еси нам, Господи? / Ты бо еси Отец наш, яко Авраам не уведет нас, и Израиль не позна нас, / но Ты, Господи, Отец наш, избави ны, яко изначала Имя Твое на нас есть. / Почто уклонил еси нас, Господи, заблудити от пути Твоего? / Ожесточил еси сердца наша, еже не бояться Тебе? / Обратися раб Твоих ради, племен ради наследия Твоего. / Да помале наследствуем гору святую Твою. / Противницы наши попраша святыню Твою. Быхом яко от начала, егда не владел еси нами, ниже назвася Имя Твое на нас. / Аще отверзеши небо, трепет примут от Тебе горы и растаються, яко воск от лица огня тает. / И поглотит огонь супостаты Твоя, и явлено будет Имя Твое противным Твоим. / От лица Твоего языцы возмзутся. Егда сотвориши славная, трепет примут от Тебе горы. / От века не слышахом, ниже очи наши видеша Бога, разве Тебе, и дела Твоя истинна, и сотвориши терпящим Тя милость. / Срящет бо милость творящая правду, и пути Твои помянут.

/ И ныне, Господи, Отец наш Ты еси, мы же брение; и Ты Создатель наш, и дела рук Твоих вси мы. / Не прогневайся на ны, Господи, зело, и да не помянеши во время грехов наших; / и ныне призри, Господи, яко людие Твои вси мы.

Премудрости Соломони чтение:

Праведник аще постигнет скончаться, в покои будет. / Осудит же праведник умирая живущия нечестивыя; / узрят бо кончину праведнаго и не уразумеют, что усоветова о нем, и во что утверди его Господь: / приидут бо в помышление согрешений своих ужасни, и обличит их противу беззакония их. / Тогда станет в дерзновении мнозе праведник, пред лицем оскорбивших его и отметающих труды его. / Видевше же его смятутся страхом многим, и ужаснутся о преславном спасении его. / И рекут в себе, кающиеся: / сей бе, егоже имехом некогда в посмех и в притчу поношения. / Безумнии, житие его вменихом неистово, и кончину его безчестну. / Како вменися в сынех Божиих, и во святых жребий его есть? / убо заблудихом от пути истиннаго, и правды свет не облиста нам, и солнце не возсия нам. / Беззаконных исполнихомся стезь и погибели, и ходихом стези непроходны, / пути же Господня не разумехом.

Премудрости Соломони чтение:

Похваляему праведнику, возвеселятся людие: /
безсмертие бо есть память его, / яко от Господа
познавается и от человек, / и угодна Господеви
душа его. / Возлюбите убо, о мужие, мудрость и
поживете: / восхощите ея и наказани будете. /
Начало бо ея любви и соблюдение закона. /
Почтите премудрость, да во веки царствуете. /
Возвещу вам и не скрью от вас таин Божиих, /
яко Той мудрости Наставник есть, и мудрых
Исправитель, / и всякому смыслу и делу Хитрец.
/ И всем смыслом научит мудрость, / есть бо в
ней Дух Разумен и Свят, / и сияние Света
присносущнаго, и образ благодати Божия. / Тая
други Божия и пророки устрояет, /
благословеннейши же есть солнца и паче всякаго
сотворения звезд, / свету сосуждаема,
обретается первейши. / Тая угождающих ей от
болезни избави / и настави на стези правыя. /
Даде им разум имети свят, / и сохрани я от
ловящих, и подвиг крепок подаде им. / Да
разумеют вси, яко сильнейши всего есть
благочестие, / и никогдаже преможет злоба
мудрости, / ниже преидет злыя обличающи суд.
/ Рекоша же в себе, помысливше неправедно: /
насильствуем праведному, и не пощадим
преподобства его, / ни усрадимся седин
старости многолетны. / Будет бо нам крепость

закон / и уловим праведнаго, / яко неугоден
 нам есть, / и противится делом нашим, и
 поносит нам отпадение закона, / и обличает нам
 согрешения наказания нашего. / Возвещает нам
 разум имети Божий, / и отрока Господня себе
 именует. / Бысть нам на обличение
 помышлений наших и тяжек нам есть, / и
 видим, яко неподобно иным житие его, и
 изменены стези его. / В поругание вменихомся
 ему, / и удаляется от путей наших, яко от
 нечистот, / и блажит последняя праведных. /
 Увидим убо, аще словеса его истинна суть, /
 искусим, яже сбываются ему. / Руганием и
 мукою истяжем его, / да разумеем кротость его
 и искусим беззлобство его, / смертию
 безобразною осудим его, / будет бо посещение
 от словес его. / Сия помыслиша и прельстишася,
 ослепи бо я злоба их, / и не разумеша таин
 Божиих и не разсудиша, / яко Ты еси Бог Един,
 живота имеяй и смерти власть, / и спасаай во
 время скорби, и избавляяй от всякаго зла. /
 Щедр и Милостив, и давай преподобным Своим
 Благодать, / и Своею мышцею гордым
 противляйся.

На литии стихиры, глас 7:

Болезнуя сердцем пастырским / об овцах, горце
 разсеянных, / давидски стена, изгнанниче, / ко

Спасу зовеш, Владимире: / внидоша воды
слезныя до души моея, / да не постыдятся о мне
терпящи Тебе, Господи, // ниже да посрамятся
ищущи Тебе.

Поношения поносящих, Боже, Тебе / нападоша
на мя, раба Твоего, / воздыхаеши
терпеливейше, / аз же, Спасе, к Тебе молитвою:
/ не забуди, услыши мя в милости, // се бо есть
время благоволения Твоего.

Се течение совершается, / возглашается суд
убийственен, / о Владимире, агнче и пастырю, /
к заколению ныне тщишися; / пред миром
безгласен являясь, / духу дышащу
псалмопением: / услыши мя, Господи, яко блага
милость Твоя, / поношение претерпех Тебе ради,
Святой, / вонми души моей и избави ю, //
спасение Твое, Боже, да примет мя.

Се, кончаему на Руси лету лютому, / плачем
вдов и сирот преисполнену, / пятию сиротами и
вдовицею / неутешней земли приложилось, /
убиену ти, святе, в Бутове; / в небе ж Русском
звезда возсияла есть. / Нам же, светом молитв
твоих просвещаемым, / вложи, отче, в уста
покаяния песнь: / Свят, Свят, Свят еси, Боже
Праведне, // Богородицею помилуй нас.

Слава, глас 2, подобен: Егда от древа:

Сияя достоинством души, / восходя к Свету
Господу, / уяснил еси евангельский путь, /

утеснение всякое претерпев, / горних достиг
еси высот, / о Владимире солнце ясное, / яко
свет второй Свету первому предстоя, / разжени
души моя хладную тьму // лучею теплою
МОЛИТВ ТВОИХ.

И ныне, глас и подобен тойже:

Сиянием пренебесной чистоты, / о Дево
Пренепорочная, / небеса воистину облистала
еси, / славо богозданныя земли, о Мариам, //
Богородице и Мати Света.

На стиховне стихиры, глас 2.

Подобен: Доме Евфрафов:

Земле Холмская, / саде Православия, / крин
святой прозябшая — / дивнаго Владимира, //
честью процветай нетленною.

Стих: Праведник яко финикс процветет, / яко
кедр, иже в Ливане, умножится.

Граде первопрестольне, / велий сонм явивый /
ясных новомученик, / сограждан Владимира, //
славою сияй Божественне.

Стих: Насаждени в дому Господни, / во дворех
Бога нашего процветут.

Дебрь Волоколамская, / в язвищи сокрывшая /
от волков лютых агнца / кроткаго Владимира,
// подвигом того красуйся.

Слава, глас и подобен тойже:

Митрофана чудного / светлый сонаследниче, /
теплый наш печальниче, / умоли, Владимире, //
Господа о любящих тя.

Тропарь, глас 5:

Просвещен любовью Христовою, / согревал еси
тою верных сердца, / от нихже солнцем ясным
наречен, / к зениту славы, яже от Единыя
Троицы, восходя, / закатом багряным
мученичества украсився, / во Царствии
Небеснем возсиял еси светлейше, / о Владимире
священнострадальче, / моли Солнца правды
Христа // просветити и спасти души наша.

НА УТРЕНИ

На	Бог	Господь:
тропарь	святаго	дважды.
Слава, и ныне, предпразднства.		

По 1-м стихословии седален, глас 2:

Несть души моей, отче, пластыря приложить, /
ниже елеа ранам ея, ниже obligation обрести, /
обаче исцелитися уповаю // твоими,
Владимире, и новомученик молитвами.

Слава и ныне, предпразднства.

По 2-м стихословии седален, глас 2:

Не сотворшему милости суд без милости есть, /
и что отвечаю на Суде Спаса Всемиловитоваго, /
аще не ты, честне Владимире, // умиловитиши
Того о мне?

Слава и ныне, предпразднства.

По полиелеи седален, глас 6:

Погибающим юродство крест есть, / сила Божия
— новомучеником / и тебе, стратиже Владимире
// христолюбиваго сих воинства.

Слава и ныне: Погибшим взыскание веми Тя, /
Милосердия Мати, / сего ради со отцем нашим
Владимиром сыновне зовем Ти: // радуйся
Дево, христиан похвало!

Прокимен на утрени, глас 4: Святым, иже
суть на земли Его, / удиви Господь вся хотения
Своя в них.

Стих: Предзрех Господа предо мною выну, / яко
одесную мене есть, да не подвижуся.

Евангелие от Матфея, зачало 36.

По 50-м псалме стихира, глас 6:

Святым иже суть на Руси Святей, /
новомучеником преславным / удиви Господь
хотение Свое, / еже Церковь Русскую возродити
/ дерзновенным сих ходатайством; / сего ради о

уделех своих умоляюще / Владимиру
пречудному возопиим: // радуйся, новый
священномучениче!

Канон, глас 4,
егоже краегранесие сице: О любовию тя
поющих моли, отче Владимире

Песнь 1

Ирмос: Воду прошел яко сушу / и египетского
зла избежав, / израильтянин вопияше: //
Избавителю и Богу нашему поим.

Огради моя помышления и чувства охрани, о
Христе Царю, да Владимира дерзну воспети,
верного служителя Твоего.

Луков-град, сияй светлейше, возшедшу в тебе
Владимиру ясну, светочу и путевождю нашему.

Юношеския страсти отверг, начало учения
полагаеши на духовней стезе, да люди Божия
приведеш к земли обетованней, вечней.

Богородичен: Богородицею храними, возопиим
благодарственно из глубины души: радуйся,
Дево Чистая и Мати христиан.

Песнь 3

Ирмос: Ты еси утверждение / притекающих к
Тебе, Господи, / Ты еси свет омраченных, // и
поет Тя дух мой.

Отверз юная и честная уста, слово Божие
возвещает Владимир в Радоме, яко
благоговейный чтец Церкви великия.

Верою приемлещи Божие звание,
страннолюбиве, Авраама произволению
подражаяй, оставль землю отечества, да жертвы
чистыя принесещи Христу.

Ирина мученица радовашеся, видящи в храме
своем чина Стефанова украшение, мужа мудра
и смыслена, Владимира диакона, мученика
произволением.

Богородичен: Юницу, во едино нас на хвалу
сбравшую, приидите, вернии, воспоим, стадо
сущее Сына Ея, Юнца и Пастыря.

Седален, глас 4 :

Зрелый клас села церковного / явился еси,
Владимире, / сего ради, умерщвлением лютым
посечен, / в небесней житнице // яже
обретаешися.

И ныне, предпразднства.

Песнь 4

Ирмос: Услышах, Господи, / смотрения Твоего
таинство, / разумех дела Твоя // и прославих
Твое Божество.

Тихону Святейшему возглашающу — Чадца! Зову вы с собою на страдания и смерть за Христа — трепетом внемлеши и к священства благому игу дерзаеши мужественне.

Языков апостол вопиет: наставников вере подражайте; темже течет Владимир иерей по духовнем отце своем, паче же по Иисусе Господе.

Прехождение твое во удел Митрофаниев радостотворит люди, умножая во граде свидетельство доброе о теплом пастыре и молитвеннике.

Богородичен: Очисти мой ум, Спасе Христе, Рождшия Тя молитвами, и сердце умягчи, Владыко, да песнословлю во истине Твое Божество.

Песнь 5

Ирмос: Просвети нас повелении Твоими, Господи, / и мышцею Твоею высокою // Твой мир подаждь нам, Человеколюбче.

Юже взыскал еси Премудрость Божию, Юже возжелел еси Любовь истинную, Та и светло осеняет тя, Иже над всеми есть Иисус Человеколюбец.

Щит, по апостолу, вера есть, не посрамляет и надежда, любви же воистину совершенства союз,

темже, мудре Владимире, выну в сих разумевал, в сих и пребывал еси.

Истинно зря в тебе добродетели краеугольные, от конец Москвы собирается паства твоя, да любовию утвердиши ю на недвижимем веры камени.

Богородичен: Христе, зриши помрачение наше, зриши и душ смятение, Рождшею Тя умолен буди, не лиши нас мира Твоего, Человеколюбче.

Песнь 6

Ирмос: Молитву пролию ко Господу / и Тому возведу печали моя, / яко зол душа моя исполнися / и живот мой аду приближися, / и молюся, яко Иона: // от тли, Боже, возведи мя. Молитвою еже о пастве сердце ко Господу изливал еси, се бо молитися истинно яко кровь пролияти есть.

О распинающих Господь и Учитель молится, тако и Владимир, Того ученик, словом и делом творит и учит, егда судищу предается безбожных, и запустевает до времени Митрофана храм.

Лютой дерзости раскольничей мужественне противопостав иногда, паки дерзаеши о Господе, на горькия работы осужден безчеловечными и лютыми.

Богородичен: Ионе подражающе, вопием из глубины зол, страстьми конечно обуреваемии: не презри, Спасе, се бо Мати Твоя умоляет за ны.

Кондак, глас 2:

Заступати немощныя, малодушныя утешати / научився от Алексия праведнаго, / паству многую собрал еси в долготерпении, / от неяже безбожными люте разлучен, / крестный путь облобызал еси; / ныне со Христом присно радуешься, / непрестанно, Владимире, Того моля // о душах наших.

Икос:

Егда прииде на землю Русскую година лютая, / о Владимире доблественне, / крепчае подвиглся еси о благочестии, / таже прошед сугубое поприще страдания и смерти, / Христа, на тыя призвавшаго тя, / дерзновенно исповедал еси / яко Учителя и Подвигоположника, / темже непрестанно Того яко Спаса и Судию // моли о душах наших.

Песнь 7

Ирмос: От Иудеи дошедше отроцы / в Вавилоне иногда, / верою Троическою пламень пещный попраша, поюще: // отцев Боже, благословен еси.

Озаряется север сиянием подвигов исповедник
святых, просиявшу им Владимиру досточудну,
сострадальцу оных и печальнику нашему.

Тремя леты мучительства, яко тридесятьми
удрученный, возвращаешися во своя, зело юн
сердцем незлобивым, паки и духом
смиреномудр.

Что Тебе принесу, Христе, яко пострадал еси
мене ради? — сие болезнь помышлял еси, яже
сердцу отвечающую: убо паки спостражду Ти,
да с Тобою прославлюся.

Богородичен: Егоже возлюбила еси Отца, Егоже
родила еси Сына, и Духа, пречудно сошедша на
Тя, моли, Чистая, о чисте вопиющих: Боже
Пречисте, благословен еси.

Песнь 8

Ирмос: Царя Небеснаго, / Егоже поют вси
ангельстии, // хвалите и превозносите во вся
веки.

В Язвищи призываешися послужити нас ради
Изъязвлену и не имущему где поклонити главу,
токмо в сердце смиренном, любовию Того
уязвленном.

Лукавое судище злосоветия исполнено, легионом
ангелов готовым предстати, обаче
замедляющим, егда волею следует раб крестным
путем Владыки.

Ад Бутова в рай претворися Владимиру и собратиям его, возсия и нам спасения надежда, се бо воистину кровь мучеников семя Церкви есть.

Богородичен: Дева соскорбит, зря страдания новомученик, паки же сорадуется, яко Мати, сомолитвенники о нас обретшая.

Песнь 9

Ирмос: Воистину Богородицу Тя исповедуем, / спасении Тобою, Дево Чистая, // с безплотными лики Тя величающе.

Искушен скорбьми по всяческим, яко в душе избран Алексиев сын, мученичества венцем украшаешься, в сем стоянии до конца укрепи и нас, о Владимире терпеливейший.

Митрофана славнаго соработниче, труд велик души употребив, воздержания мерность чисте храня, раем сладости обогатился еси; от плодов того напитай и нас, о Владимире щедродателю.

Иосифу милосердому подражая, отечество того паки просветил еси, яко кроткий о Христе изгнанник, яве Волоцкия земли звездо новая, осияй и нас, о Владимире.

Рая вышняго удостоился еси, яко крепкий о Христе страдалец, не отступи убо, Того моля о нас, дондеже и на небо возведши тя воспевших любовию.

Богородичен: Егда славнии новомученицы
воздохнут о нас Богородице, уповаем Тою
спасение уллучити и возопити Благословенней:
Яже о всех Благая Мати, слава Тебе.

Светилен:

Солнце светлостию превозшедый, / святостию
возсияв на небесех, / Света истиннаго лучу и
нам ниспосли, / о Владимире ясне, // от Христа
— Света миру и Правды Солнца.

На хвалитех стихиры 4, глас 8.

Подобен: О преславнаго чудесе:

Отче Владимире пребогате, / на земли Святаго
Духа Божия стяжав, / яко благаго воистину
сокровища, / Егоже дарми ныне на небесех
преизобилуеши, / обнищавших нас не забуди,
щедре, / да долгов греховных свободившеся, /
покаяния плоды обогатимся / и милость уллучим
безмерную // Единого Всемилоствиваго.

Отче Владимире премудре, / положил еси жизнь
на созидание / храма Божия в себе самем. /
Людие от конец собирахуся к тебе / слово
слушати любве духовныя, / таже и
благословением твоим / потрудишся о Господе;
/ и нас удрученных тяготою греха // рабы
Христовы истинныя сотвори.

Отче Владимире преблаженне, / дея заповедем
 Божиим учил еси, / первее во смирении
 утверждатися, / плачем о гресех приимати
 утешение, / кротостию землю новую наследуя, /
 еяже красоты не виде око, / и ухо земнородных
 не слыша, / и на сердце не възиде человеку, //
 яже уготова Бог любящим Его.

Отче Владимире преславне, / чтим тебе,
 чадолюбиваго отца, / житием верных яве
 наказующа / небаязненно теци евангельским
 путем, / имже выну следуя Христу, / изгнанием
 же и смертью горькою искушен, / вселился еси
 в обители Отца Небеснаго, / идеже некончаемая
 радости наслаждаешься, // юже Бог уготова
 тебе, возлюбившему Его.

Глас,3:

Взятую голубю в стаю ангельскую, / вознесену к
 Вышнему духом в горняя, / сиротствуют
 пяточисленнии птенцы, / утесняеми всюду
 вранами, / но в лишении храними материю, /
 сею надеждею окриляются: / еже уютствовати
 во веки со отцем // под крилами Орла
 Небеснаго.

Слава, глас тойже:

Сострадательныя послушницы / о Христе
 сосвидетельствовати / с собою, Владимире,
 привлекл еси, / и нас, твой подвиг воспевших, /
 послушая сострадательне, / ко спасения тесным

стесям // ясным образом твоим и молитвами
привлещы.

И ныне, предпразднства.

На литургии
блаженны на 8: Предпразднства 4 и
святому, глас 8:

Стих: Блажени есте, егда поносят вам, и
изженут, / и рекут всяк зол глагол на вы, лжуще
Мене ради.

Лютой дерзости раскольничей/ мужественне
противостав иногда, / паки дерзаеши о Господе,
/ на горькия работы осужден //
безчеловечными и лютыми.

Стих: Радуйтесь и веселитесь, / яко мзда ваша
многа на Небесех.

Озаряется север сиянием подвигов исповедник
святых, / спросиявшу им Владимиру
досточудну, / сострадальцу оных // и
печальнику нашему.

Слава: Ад Бутова в рай претворися / Владимиру
и собратиям его, / возсия и нам спасения
надежда, / се бо воистину // кровь мучеников
семя Церкви есть.

И ныне: Егда славнии новомученицы /
воздохнут о нас Богородице, / уповаем Тою

спасение улучшить / и возопити Благословенней:
// Яже о всех Благая Мати, слава Тебе.

Прокимен, глас 7:

Восхвалятся преподобнии во славе / и
возрадуются на ложах своих.

Стих: Воспойте Господеви песнь нову, /
хваление Его в церкви преподобных.

Апостол к Римляном, зачало 99.

Аллилуия, глас 4:

Воззваша праведнии, и Господь услыша их, / и
от всех скорбей их избави их.

Стих: Многи скорби праведным, / и от всех их
избавит я Господь.

Евангелие от Иоанна, зачало 52.

